

摘藻堂四庫全書薈要

集部

欽定四庫全書薈要

御選唐宋詩醇卷五

隴西李白詩五

目錄

襄陽歌

江上吟

侍從宜春苑奉詔賦龍池柳色初青聽新鶯百轉

歌

西嶽雲臺歌送丹丘子

梁園吟

鳴臯歌送岑徵君

橫江詞

白雲歌送劉十六歸山

秋浦歌

當塗趙炎少府粉圖山水歌

上皇西巡南京歌

峨眉山月歌

江夏行

清溪行

贈孟浩然

見京兆韋叅軍量移東陽

贈韋侍御黃裳二首

贈裴十四

贈清漳明府姪聿

贈新平少年

口號贈徵君鴻

秋日鍊藥院鑷白髮贈元六兄林宗

憶襄陽舊遊贈馬少府巨

對雪獻從兄虞城宰

贈昇州王使君忠臣

贈別從甥高五

醉後贈從甥高鎮

贈秋浦柳少府

中丞宋公以吳兵三千赴河南軍次尋陽脫予之
囚叅謀幕府因贈之

流夜郎贈辛判官

贈常侍御

贈易秀才

經亂離後天恩流夜郎憶舊遊書懷贈江夏韋太
守良宰

贈漢陽輔錄事

贈盧司戶

贈從弟南平太守之遙

流夜郎半道承恩放還兼欣剋復之美書懷示息

秀才

宿清溪主人

巴陵贈賈舍人

贈從弟宣州長史昭

陳情贈友人

贈錢徵君少陽

登敬亭山南望懷古贈竇主簿

經亂後將避地剡中留贈崔宣城

御選唐宋詩醇卷五目錄

欽定四庫全書薈要卷一萬九千三百二十九集部

御選唐宋詩醇卷五

隴西李白詩五

襄陽歌

落日欲沒峴山西倒著接離花下迷襄陽小兒齊拍手
攔街爭唱白銅鞮傍人借問笑何事笑殺山翁醉似泥
鸕鷀杓鸚鵡杯百年三萬六千日一日須傾三百杯遙
看漢水鴨頭綠恰似葡萄初醖醅此江若變作春酒壘

麴便築糟丘臺千金駿馬換小妾笑坐雕鞍歌落梅車
傍側挂一壺酒鳳笙龍管行相催咸陽市中歎黃犬何
如月下傾金壘君不見晉朝羊公一片石龜頭剝落生
莓苔淚亦不能為之墮心亦不能為之哀清風明月不
用一錢買玉山自倒非人推舒州杓力士鐺李白與爾
同死生襄王雲雨今安在江水東流猿夜聲

意曠神逸極類唐之趣入後俯仰含情乃有心人語韜
精日沈飲誰知非荒宴亦同此懷抱耳子美云長鑣長

鑱白木柄我生託子以為命語奇矣此詩云舒州杓力士鑱李白與爾同死生苦樂不同造語正復匹敵

歐陽修曰落日欲沒峴山西四句此常語也至於清風明月不用一錢買玉山自倒非人推然後見太白之橫放其所以驚動千古者固不在此乎

黃庭堅曰李白歌詩度越六代與漢魏樂府爭衡

彭乘曰歐陽公題滄浪亭云清風明月本無價可惜只賣四萬錢與太白致辭雖異然皆善言風月

古今樂錄襄陽樂宋隨王誕作襄陽蹋銅蹄者梁武
西下所製沈約又作其和云襄陽白銅蹄聖德應乾
來

江上吟

木蘭之枻沙棠舟玉簫金管坐兩頭美酒尊中罍斛
載妓隨波任去留仙人有待乘黃鶴海客無心隨白鷗
屈平詞賦懸日月楚王臺榭空山丘興酣落筆搖五嶽
詩成笑傲凌滄洲功名富貴若長在漢水亦應西北流

發端四語即事之辭也以下慷慨當以慨雖帶初唐風調而氣骨迥絕矣反筆作結殊為道健

侍從宜春苑奉詔賦龍池柳色初青聽新鶯百轉
歌

東風已綠瀛洲草紫殿紅樓覺春好池南柳色半青青
紫烟嫋娜拂綺城垂絲百尺挂雕楹上有好鳥相和鳴
間闕早得春風情春風卷入碧雲去千門萬戶皆春聲
是時君王在鎬京五雲垂暉耀紫清伏出金宮隨日轉

天回玉輦繞花行始向蓬萊看舞鶴還過萑石聽新鶯
新鶯飛繞上林苑願入簫韶雜鳳笙

清圓流麗可以鼓吹休明千門萬戶一語氣象頗大全
篇格調想見初唐餘響

范德機曰此賦物詩格調既高法度又謹妙而易見
者也

蕭士贇曰蓬萊萑石當時宮苑名

沈德潛曰西都賦後宮則有萑若椒風作萑石者誤

也

西嶽雲臺歌送丹丘子

西嶽崢嶸何壯哉，黃河如絲天際來。
黃河萬里觸山動，盤渦轂轉秦地雷。
榮光休氣紛五彩，千年一清聖人在。
巨靈咆哮擘兩山，洪波噴箭射東海。
三峯却立如欲摧，翠厓丹谷高掌開。
白帝金精運元氣，石作蓮花雲作臺。
雲臺閣道連窈冥，中有不死丹丘生。
明星玉女備灑掃，麻姑搔背指爪輕。
我皇手把天地戶，丹丘談天與天語。

九重出入生光輝東來蓬萊復西歸玉漿儻惠故人飲
騎二茅龍上天飛

健筆凌雲一掃靡靡之調

梁園吟

我浮黃河去京闕挂席欲進波連山天長水濶厭遠涉
訪古始及平臺間平臺為客憂思多對酒遂作梁園歌
却憶蓬池阮公詠因吟淶水揚洪波洪波浩蕩迷舊國
路遠西歸安可得人生達命豈暇愁且飲美酒登高樓

平頭奴子搖大扇五月不熱疑清秋玉盤楊梅為君設
吳鹽如花皎白雪持鹽把酒但飲之何用孤高比雲月
昔人豪貴信陵君今人耕種信陵墳荒城虛照碧山月
古木盡入蒼梧雲梁王宮闕今安在牧馬先歸不相待
舞影歌聲散綠池空餘汴水東流海沈吟此事淚滿衣
黃金買醉未能歸連呼五白行六博分曹賭酒酣馳輝
歌且謠意方遠東山高卧時起來欲濟蒼生未應晚
懷古之作慷慨悲歌興會颺舉范傳正有云李白脫屣

軒冕釋羈鞬鎖自放宇宙間飲酒非嗜其酣樂取其昏
以自穢好神仙非慕其輕舉欲耗壯心遣餘年作詩非
事其文律取其吟咏以自適三誦斯篇信然

桂臨川曰太白樂天知命感今懷古備載此詩

阮籍詠懷詩徘徊蓬池上還顧望大梁淶水揚洪波
曠野莽茫茫

歸藏啓筮曰有白雲出自蒼梧入於大梁

鳴皋歌送岑徵君

自註時梁園三尺雪在清泠池作

若有人兮思鳴皋阻積雪兮心煩勞
洪河凌競不可以
徑度冰龍鱗兮難容舠邈仙山之峻極兮聞天籟之嘈
嘈霜厓縞皓以合沓兮若長風扇海湧滄溟之波濤元
猿綠羆舐馥峯岌危柯振石駭膽慄魄羣呼而相號峯
崢嶸以路絕挂星辰於巖叅送君之歸兮動鳴皋之新
作交鼓吹兮彈絲觴清泠之池閣君不行兮何待若反
顧之黃鶴掃梁園之羣英振大雅於東洛巾征軒兮歷
阻折尋幽居兮越巘嶸盤白石兮坐素月琴松風兮寂

萬壑望不見兮心氛氲蘿冥冥兮霰紛紛水橫洞以下
淥波小聲而上聞虎嘯谷而生風龍藏溪而吐雲寡鶴
清唳飢鼃嘖呻菟獨處此幽默兮愀空山而愁人雞聚
族以爭食鳳孤飛而無隣蜺蜺嘲龍魚目混珍嫫母衣
錦西施負薪若使巢由桎梏於軒冕兮亦奚異乎夔龍
蹶躅於風塵哭何苦而救楚笑何誇而却秦吾誠不能
學二子沽名矯節以耀世兮固將棄天地而遺身白鷗
兮飛來長與君兮相親

作騷體便覺屈原宋玉去人不遠其不規規步趨處正是其才高氣逸為之耳望不見今一段寫出幽居寂寞之況興起下文脈絡相貫陳繹曾謂白詩祖風騷宗漢魏善於掉弄造出奇怪驚動心目忽然撇出妙入無聲其知言者乎王世貞以為歌行縱橫往往強弩之末間以長語英雄欺人是不知其錯落變化自有天然節奏而輕議之也

晁補之緝變離騷敘此篇曰鳴皋歌者唐翰林供奉

李白之所作也白天才俊麗不可矩矱然要長於詩至鳴皋歌一篇本末楚辭也而世誤以為詩因為出之其畧曰螭蜥嘲龍魚目混珍嫫母衣錦西施負薪此諄諄效屈原卜居及賈誼弔屈原語而白才自逸蕩故或離而去之云

范德機曰此篇稍長而詞意易見亦楚人之流也惟其有螭蜥魚目巢由夔龍等語故前輩嘗稱之然此實非太白之用意處妙不在此

吳昌祺曰元猿綠羅疊四句而以五句為一韻非騷
人法且多對仗亦太白之古詩耳雞聚族爭食以下
乃白感岑之歸隱而發歎與岑無關

一統志鳴皋山在河南嵩縣東北四十里

橫江詞

橫江西望阻西秦漢水東連揚子津白浪如山那可渡
狂風愁殺峭帆人

橫江館前津吏迎向余東指海雲生郎今欲渡緣何事

如此風波不可行

梁簡文烏棲曲云郎今欲渡畏風波白用其語風致轉勝若其即景寫心則託興遠矣

范德機曰此篇氣格合歌行之體使人嗟咏有無窮之思

胡應麟曰尚是樂府古調

趙執信曰橫江館前一首此樂府也問余何事一首此古詩也

白雲歌送劉十六歸山

秦山楚山皆白雲
白雲處處長隨君
君入楚山裏雲亦隨君
渡湘水湘水上女蘿衣
白雲堪卧君早歸
吐語如轉丸珠又如白雲卷舒清風與歸畫家逸品

秋浦歌

秋浦長似秋蕭條
使人愁客愁不可度
行上東大樓正西望長安下見江水流
寄言向江水汝意憶儂不遥傳
一掬淚為我達揚州

觸物懷人抑鬱誰語澤畔行吟深情宛露自是騷人之緒

泂草志秋浦隋縣名唐置池州

秋浦猿夜愁黃山堪白頭清溪非隴水翻作斷腸流欲去不得去薄遊成久遊何年是歸日雨淚下孤舟

秋浦錦駝鳥人間天上稀山雞羞渌水不敢照毛衣
兩鬢入秋浦一朝颯已衰猿聲催白髮長短盡成絲
秋浦千重嶺水車嶺最奇天傾欲墮石水拂寄生枝

奇境如畫

千千石楠樹萬萬女貞林
山山白鷺滿澗澗白猿吟
君莫向秋浦猿聲碎客心

周南采蘋章連用六于以字十九首青青河畔草連用
六疊字句白詩祖之

邏人橫鳥道江祖出魚梁
水急客舟疾山花拂面香
江行真景

白髮三千丈綠愁似个長
不知明鏡裏何處得秋霜

突然而起四句三折格力極健要是倒裝法耳陳師道云白髮緣愁百尺長語亦自然王安石云綠成白髮三千丈有斧鑿痕矣

唐汝詢曰託興在意象之外

秋浦田舍翁採魚水中宿妻子張白鷗結廬映深竹似輞川詩

當塗趙炎少府粉圖山水歌

峨眉高出西極天羅浮直與南溟連名公繹思揮彩筆

驅山走海置眼前滿堂空翠如可掃赤城霞氣蒼梧煙
洞庭瀟湘意渺綿三江七澤情洄洑驚濤洶湧向何處
孤舟一去迷歸年征帆不動亦不旋飄如隨風落天邊
心搖目斷興難盡幾時可到三山巔西峯崢嶸噴流泉
橫石蹙水波潺湲東厓合沓蔽輕霧深林雜樹空芊綿
此中冥昧失晝夜隱几寂聽無鳴蟬長松之下列羽客
對坐不語南昌仙南昌仙人趙夫子妙年歷落青雲士
訟庭無事羅衆賓杳然如在丹青裏五色粉圖安足珍

真仙可以全吾身若待功成拂衣去武陵桃花笑殺人
寫畫似真亦遂驅山走海奔轅腕下杳然如在丹青裏
又以真為畫各有奇趣康樂之模山範水從此另開生
面

漢書梅福為南昌尉棄官去至今傳以為仙

上皇西巡南京歌

誰道君王行路難六龍西幸萬人歡地轉錦江成渭水
天迴玉壘作長安

渭水長安隱寓故都之感且以幸其早還非誇成都佳麗也

胡震亨曰王弼州以地轉錦江等句不異宋人東狩錢塘封事夫太白亦詩酒自娛跌宕一生者耳安能顧語忌拘教義為是屑屑者哉詩人各自寫一性情各自成一品局固不得取錦袍豪翰強繩以瘦筇苦藻必同籥吹為善也

劔閣重關蜀北門上皇歸馬若雲屯少帝長安開紫極

雙懸日月照乾坤

述當時事何等明白可作詩史有謂肅宗當避位以請上皇復辟者有謂惑張良娣徙上皇於南內者皆傳會之說

沈德潛曰二句上皇三句少帝而以末句總收格法又別

唐書天寶十五載六月帝幸蜀七月太子即位於靈武尊帝為上皇天帝改元至德二載十二月上皇至

京師大赦以蜀郡為南京

峨眉山月歌

峨眉山月半輪秋影入平羌
江水流夜發清溪向三峽
思君不見下渝州

但覺其工然妙處不傳

劉辰翁曰含情淒惋有竹枝縹緲之音

王世貞曰二十八字中有峨眉山平羌江清溪三峽
渝州使後人為之不勝痕迹矣益見此老鑪錘之妙

江夏行

憶昔嬌小姿春心亦自持為言嫁夫壻得免長相思誰
知嫁商賈令人却愁苦自從為夫妻何曾在鄉土去年
下揚州相送黃鶴樓眼睂帆去遠心逐江水流只言期
一載誰謂歷三秋使妾腸欲斷恨君情悠悠東家西舍
同時發北去南來不逾月未知行李游何方作箇音書
能斷絕適來往南浦欲問西江船正見當壚女紅粧二
八年一種為人妻獨自多悲悽對鏡便垂淚逢人只欲

啼不如輕薄兒旦暮長相隨悔作商人婦青春長別離
如今正好同懽樂君去容華誰得知

曲盡怨別之情絮絮可聽豈無膏沐誰適為容末句正
用此意

清溪行

清溪清我心水色異諸水借問新安江見底何如此人
行明鏡中鳥度屏風裏向晚猩猩啼空悲遠遊子
佇興而言鏗然古調一結有言不盡意之妙

贈孟浩然

吾愛孟夫子風流天下聞
紅顏棄軒冕白首卧松雲
醉月頻中聖迷花不事君
高山安可仰徒此揖清芬

見京兆韋叅軍量移東陽

潮水還歸海流人却到吳
相逢問愁苦淚盡日南珠

贈韋侍御黃裳二首

太華生長松亭亭凌霜雪
天與百尺高豈為微颺折
桃李賣陽豔路人行且迷
春光掃地盡碧葉成黃泥
願君

學長松慎勿作桃李受屈不改心然後知君子

見君乘驄馬知上太山道此地果摧輪全身以為寶我
如豐年玉棄置秋田草但勗冰壺心無為歎衰老

古道照人得朋友交勉之誼勗君青松心努力保霜雪
立言如此可以不朽

贈裴十四

朝見裴叔則朗如行玉山黃河落天走東海萬里寫入
胸懷間身騎白黿不敢渡金高南山買君顧徘徊六合

無相知飄若浮雲且西去

吳昌祺曰有如生龍活虎非世人所可駕馭天實授之豈人力耶

贈清漳明府姪聿

我李百萬葉柯條布中州天開青雲器日為蒼生憂小
邑且割雞大刀佇烹牛雷聲動四境惠與清漳流弦歌
詠唐堯脫落隱簪組心和得天真風俗猶太古牛羊散
阡陌夜寢不扃戶問此何以然賢人宰吾土舉邑樹桃

李垂陰亦流芬河堤繞綠水桑柘連青雲趙女不治容
提籠晝成羣綠絲鳴機杼百里聲相聞訟息鳥下堦高
卧披道帙蒲鞭挂簷枝示恥無撲扶琴清月當戶人寂
風入室長嘯無一言陶然上皇逸白玉壺冰水壺中見
底清清光洞毫髮皎潔照羣情趙北美佳政燕南播高
名過客覽行謠因之頌德聲

天開青雲罷日為蒼生憂似范仲淹一流人物心和得
天真以下循良之實藹然可覩為民牧者直當書之於

座右

贈新平少年

韓信在淮陰少年相欺凌屈體若無骨壯心有所憑一
遭龍顏君嘯咤從此興千金荅漂母萬古共嗟稱而我
竟何為寒苦坐相仍長風入短袂兩手如懷冰故友不
相恤新交寧見矜摧殘檻中虎羈紲韝上鷹何時騰風
雲搏擊申所能

鍾惺曰屈體二句可與老杜嚴僕射詩開口取將相

小心事友生並看寫出英俠本色屈伸之妙

口號贈徵君鴻

自註此公
時被徵

陶令辭彭澤梁鴻入會稽我尋高士傳君與古人齊雲
卧留丹壑天書降紫泥不知楊伯起早晚向關西

格調高朗盧鴻屢徵不起故白詩云爾末句言其當應
召也以伯起期之位置殊高

范德機曰律詩須守規矩此等五言何其嚴哉

唐書本傳鴻博學善書摛盧嵩山開元初備禮徵再

不至五年再詔徵至東都拜諫議大夫固辭還山

秋日鍊藥院鑷白髮贈元六兄林宗

木落識歲秋瓶冰知天寒
桂枝日已綠拂雪凌雲端
弱齡接光景矯翼攀鴻鸞
投分三十載榮枯同所歡
長吁望青雲鑷白坐相看
秋顏入曉鏡壯髮凋危冠
窮與鮑生賈饑從漂母餐
時來極天人道在豈吟嘆
樂毅方適趙蘇秦初說韓
卷舒固在我何事空摧殘

寫懷抱於實境約縱逸於苦調即此可以上軼鮑謝起

句本之淮南子語意奇占

憶襄陽舊遊贈馬少府巨

昔為大堤客曾上山公樓開牕碧嶂滿拂鏡滄江流
冠佩雄劍長揖韓荊州此地別夫子今來思舊遊
朱顏君未老白髮我先秋壯志恐蹉跎功名若雲浮
歸心結遠夢落日懸春秋空思羊叔子墮淚峴山頭
落日懸春秋自是千古雋句

對雪獻從兄虞城宰

昨夜梁園雪弟寒兄不知庭前看玉樹腸斷憶連枝
劉辰翁曰此詩首二語小夫賤隸誰不能道而學士
大夫或愧之矣古今甚深密義徃徃於淺易得之藹
然惻然可以感動

贈昇州王使君忠臣

六代帝王國三吳佳麗城賢人當重寄天子借高名巨
海一邊靜長江萬里清應須救趙策未肯棄侯嬴
如五六語乃為不負重寄末以侯嬴自比寓意救趙蓋

在天寶初亂後也

贈別從甥高五

魚目高泰山不如一璵璠
賢甥即明月聲價動天門
能成吾宅相不減魏陽元
自顧寡籌略功名安所存
五木思一擲如繩繫窮猿
檻中駿馬空堂上醉人喧
黃金久已罄為報故交恩
聞君隴西行使我驚心魂
與爾共飄飄雲天各飛翻
江水流或卷此心難具論
貧家羞好客語拙覺辭繁
三朝空錯莫對飯却慚
寃自笑我非夫

生事多契濶蓄積萬古憤向誰得開豁天地一浮雲此身
乃毫末忽見無端倪太虛可包括去去何足道臨岐空
復愁肝膽不楚越山河亦衾裯雲龍若相從明主會見
收成功解相訪溪水桃花流

首道贈意繼叙別情白蓋與高最厚善者自笑我非夫
一段開豁心胸遐矚曠覽沈鬱頓挫意近杜陵從此一
氣雙收聲情倍振使無後幅之雄健則氣味衰頽矣大
家風格如是

醉後贈從甥高鎮

馬上相逢揖馬鞭，客中相見客中憐。
欲邀擊筑悲歌飲，正值傾家無酒錢。
江東風光不借人，枉殺落花空自春。
黃金逐手快意盡，昨日破產今朝貧。
丈夫何事空嘯傲，不如燒却頭上巾。
君為進士不得進，我被秋霜生旅鬢。
時清不及英豪人，三尺童兒重廉蔭。
匣中盤劍裝鰐魚，閑在腰間未用渠。
且將換酒與君醉，醉醉歸託宿吳專諸。
有觸而鳴微露憤，意醉後披寫自饒天趣。

蕭士贇曰此太白少年任俠之作

李白上裴長史書曰昔東游維揚不逾一年散金三十餘萬有落魄公子悉皆濟之

贈秋浦柳少府

秋浦舊蕭索公庭人吏稀因君樹桃李此地忽芳菲
搖筆望白雲開簾當翠微時來引山月縱酒酣清暉而我
愛夫子淹留未忍歸

其人有為政之實於一起見之

中丞宋公以吳兵三千赴河南軍次尋陽脫予之
囚叅謀幕府因贈之

獨坐清天下專征出海隅九江皆渡虎三郡盡還珠組
練明秋浦樓船入郢都風高初選將月滿欲平胡殺氣
橫千里軍聲動九區白猿慙劍術黃石借兵符戎虜行
當剪鯨鯢立可誅自憐非劇孟何以佐良圖

劉辰翁曰句句壯末韻更佳

范德機曰發端雄渾而嚴真長律起辭也

胡震亨曰排律起句極宜冠冕雄渾不得作小家語
如此篇之類最為得體

流夜郎贈辛判官

昔在長安醉花柳五侯七貴同杯酒氣岸遙凌豪士前
風流肯落他人後夫子紅顏我少年章臺走馬著金鞭
文章獻納麒麟殿歌舞淹留玳瑁筵與君自謂長如此
寧知草動風塵起函谷忽驚胡馬來秦宮桃李向明開
我愁遠謫夜郎去何日金雞放赦回

中間轉捩處甚健

蕭士贇曰向明者向陽花木之義指同時儕類如辛判官之輩因兵興之際不次被用為人桃李我獨遭謫也

贈常侍御

安石在東山無心濟天下一起振橫流功成復瀟灑大賢有卷舒季葉輕風雅匡復屬何人君為知音者傳聞武安將氣振長平瓦燕趙期洗清周秦保宗社登朝若

有言為訪南遷賈

一往饒清剛之氣

贈易秀才

少年解長劍投贈即分離
何不斷犀象精光暗往時
蹉跎君自惜竄逐我因誰
地遠虞翻老秋深宋玉悲
空摧芳桂色不屈古松姿
感激平生意勞歌寄此辭

不屑屑排比聲律氣骨清
蒼自成高調空摧芳桂色
不屈古松姿所謂冠佩芳澤
而昭質未虧露本色處故可

諷咏不置

經亂離後天恩流夜郎憶舊遊書懷贈江夏韋太守良宰

天上白玉京十二樓五城仙人撫我頂結髮受長生誤
逐世間樂頗窮理亂情九十六聖君浮雲挂空名天地
賭一擲未能忘戰爭試涉霸王略將期軒冕榮時命乃
大謬棄之海上行學劍翻自哂為文竟何成劍非萬人
敵文竊四海聲兒戲不足道五噫出西京臨當欲去時

慷慨淚沾纓歎君倜儻才標舉冠羣英開筵引祖帳慰
此遠徂征鞍馬若浮雲送余驃騎亭歌鐘不盡意白日
落昆明十月到幽州戈鋌若羅星君王棄北海掃地借
長鯨呼吸走百川燕然可摧傾心知不得語却欲棲蓬
瀛彎弧懼天狼挾矢不敢張攬涕黃金臺呼天哭昭王
無人貴駿骨騄耳空騰驤樂毅儻再生於今亦奔亡蹉
跎不得意驅馬還貴鄉逢君聽弦歌肅穆坐華堂百里
獨太古陶然卧羲皇徵樂昌樂館開筵列壺觴賢豪間

青蛾對燭儼成行
醉舞紛綺席清歌繞飛梁
歡娛未終

朝秩滿歸咸陽
祖道擁萬人供帳遥相望
一別隔千里
榮枯異炎涼
炎涼幾度改
九土中橫潰
漢甲連胡兵
沙塵暗雲海
草木搖殺氣
星辰無光彩
白骨成丘山
蒼生竟何罪
函闕壯帝居
國命懸哥舒
長戟三十萬
開門納克渠
公卿如大羊
忠讜醢與趙
二聖出遊豫
兩京遂邱墟
帝子許專征
秉旄控強楚
節制非桓文
軍師擁熊虎
人心失去就
賊勢騰風雨
惟君固房陵
誠節冠終古
僕

卧香爐頂餐霞漱瑤泉門開九江轉枕下五湖連半夜
水軍來潯陽滿旌旄空名適自誤迫脅上樓船徒賜五
百金棄之若浮煙辭官不受賞翻謫夜郎天夜郎萬里
道西上令人老掃蕩六合清仍為負霜草日月無偏照
何由訴蒼昊良牧稱神明深仁恤交道一忝青雲客三
登黃鶴樓顧慙禰處士虛對鸚鵡洲樊山霸氣盡寥落
天地秋江帶峨眉雪川橫三峽流萬舸此中來連帆過
揚州送此萬里目曠然散我愁紗窓倚天開水樹綠如

髮窺日畏銜山促酒喜得月吳娃與越艷窈窕誇鉛紅
呼來上雲梯含笑出簾櫳對客小垂手羅衣舞春風賓
跪請休息主人情未極覽君荆山作江鮑堪動色清水
出芙蓉天然去雕飾逸興橫素襟無時不招尋朱門擁
虎士列戟何森森剪鑿竹石開縈流漲清深登臺坐水
閣吐論多英音片辭貴白璧一諾輕黃金謂我不愧君
青鳥明丹心五色雲間鵲飛鳴天上來傳聞赦書至却
放夜郎迴暖氣變寒谷炎煙生死灰君登鳳池去忽棄

賈生才桀夫尚吠堯匈奴笑千秋中夜四五歎常為大
國憂旌旆夾兩山黃河當中流連雞不得進飲馬空夷
猶安得羿善射一箭落旄頭

白之從璘辟也蘇軾辨其由於迫脅論甚平允此篇歷
叙交遊始末而白生平踪跡亦略見於此十月到幽州
一段蓋白自被放後北遊燕趙觀聽形勢知祿山之必
叛尾大不掉之害欲言不能述之猶覺痛切至於潼關
失守江陵煽亂與白之為璘所脅受累遠謫無不明如

指掌結尾一段慮廟堂之無人憂將帥之不一而賊之
不得速平與前遥相照應通篇以交情時勢互為經緯
汪洋灝瀚如百川之灌河如長江之赴海卓乎大篇可
與北征並峙

胡震亨曰太白永王璘一事論者不失之刻即曲為
諱失之誣惟蔡寬夫之說為衷其言云太白非從人
為亂者蓋其學本出縱橫以氣俠自任當中原擾攘
時欲藉之以立奇功耳其詩曰空名適自誤迫脅上

樓船又曰南風一掃胡塵淨西入長安到日邊亦可
見其志矣大抵才高意廣如孔北海之徒固未必有
成功而知人料事尤其所難議者或責以璘之猖獗
而欲仰以立事不能如孔巢父蕭穎士察於未萌斯
可矣若其志亦可哀矣斯言也起太白於九原儻亦
心服

贈漢陽輔錄事

鸚鵡洲橫漢陽渡水引寒煙沒江樹南浦登樓不見君

君今罷官在何處漢口雙魚白錦鱗令傳尺素報情人
其中字數無多少祇是相思秋復春

煙江風景登樓所見即此發端接出懷人之意最有氣
格

贈盧司戶

秋色無遠近出門盡寒山白雲遙相識待我蒼梧間
借問盧耽鶴西飛幾歲還

高調妙於省淨

譚元春曰起二句後代清語領此一派

贈從弟南平太守之遙

少年不得意落魄無安居願隨任公子欲釣吞舟魚常
時飲酒逐風景壯心遂與功名疎蘭生谷底人不鋤雲
在高山空卷舒漢家天子馳駟馬赤車蜀道迎相如天
門九重謁聖人龍顏一解四海春彤庭左右呼萬歲拜
賀明主收沉淪翰林秉筆回英眄麟閣崢嶸誰可見承
恩初入銀臺門著書獨在金鑾殿龍駒雕鏤白玉鞍象

牀綺席黃金盤當時笑我微賤者却來請謁為交歡一
朝謝病遊江海疇昔相知幾人在前門長揖後門闕今
日結交明日改愛君山岳心不移隨君雲霧迷所為夢
得池塘生春草使我長價登樓詩別後遥傳臨海作可
見羊何共和之

炎而附寒而去自是俗情之薄翟公書門殷浩咏詩白
何見之晚耶蘭生谷底二句逸韻可賞復有深味末四
語用古入化別具清新之致

流夜郎半道承恩放還兼欣剋復之美書懷示息秀才

黃口為人羅白龍乃魚服得罪豈怨天以愚陷網目鯨
鯢未剪滅豺狼屢翻復悲作楚地囚何日秦庭哭遭逢
二明主前後兩遷逐去國愁夜郎投身竄荒谷半道雪
屯蒙曠如鳥出籠遙欣剋復美光武安可同天子巡劒
閣儲皇守扶風揚袂正北辰開襟攬羣雄胡兵出月窟
雷破關之東左掃因右拂旋收洛陽宮迴輿入咸京席

卷六合通叱咤開帝業手成天地功大駕還長安兩日
忽再中一朝讓寶位劍璽傳無窮媿無秋毫力誰念矍
鑠翁弋者何所慕高飛仰冥鴻棄劍學丹砂臨鑪雙玉
童寄言息夫子歲晚陟方蓬

引罪自咎無怨尤之心有睠顧之誠不失忠厚本旨

宿清溪主人

夜到清溪宿主人碧巖裏簷楹挂星斗枕席響風水月
落西山時啾啾夜猿起

奇語得自眼前

巴陵贈賈舍人

賈生西望憶京華
湘浦南遷莫怨嗟
聖主恩深漢文帝
憐君不遣到長沙

可謂深婉蕭士贇以此與前篇為非白作觀其氣味非白不辨

贈從弟宣州長史昭

淮南望江南
千里碧山對我行
倦過之半落青天外
宗

英佐雄郡水陸相控帶長川豁中流千里瀉吳會君心
亦如此包納無小大搖筆起風霜推誠結仁愛訟庭垂
桃李賓館羅軒蓋何意蒼梧雲飄然忽相會才將聖不
偶命與時俱背獨立山海間空老聖明代知音不易得
撫劍增感慨當結九萬期中途莫先退

陳情贈友人

延陵有寶劍價重千黃金觀風歷上國暗許故人深歸
來挂墳松萬古知其心懦夫感達節壯士激青衿鮑生

薦夷吾一舉置齊相斯人無良朋豈有青雲望臨財不
苟取推分固辭讓後世稱其賢英風邈難尚論交但若
此友道孰云喪多君騁逸藻掩映當時人舒文振頽波
秉德冠彝倫卜居乃此地共井為比隣清琴弄雲月美
酒娛冬春薄德中見捐忽之如遺塵英豪未豹變自古
多艱辛他人縱以疎君意宜獨親奈何成離居相去復
幾許飄風吹雲霓蔽目不得語投珠冀相報按劍恐相
距所思採芳蘭欲贈隔荆渚沈憂心若醉積恨淚如雨

願假東壁輝餘光照貧女

披露胸懷不作齷齪之態叙垂隔處極為微婉得風人之意

贈錢徵君少陽

白玉一杯酒綠楊三月時春風餘幾日兩鬢各成絲秉燭唯須飲投竿也未遲如逢渭川獵猶可帝王師

登敬亭山南望懷古贈竇主簿

敬亭一迴首目盡天南端仙者五六人常聞此遊盤谿

流琴高水石聳麻姑壇白龍降陵陽黃鶴呼子安羽化
騎日月雲行翼鴛鴦下視宇宙間四溟皆波瀾汰絕目
下事從之復何難百歲落半途前期浩漫漫彊食不成
味清晨起長歎願隨子明去鍊火燒金丹

經亂後將避地剡中留贈崔宣城

雙鵝飛洛陽五馬渡江徼何意上東門胡雛更長嘯中
原走豺虎烈火焚宗廟太白晝經天頽陽掩餘照王城
皆蕩覆世路成奔峭四海望長安嘖眉寡西笑蒼生疑

落葉白骨空相吊連兵似雪山破敵誰能料我垂北溟
翼且學南山豹崔子賢主人歡娛每相召胡床紫玉笛
却坐青雲叫楊花滿州城置酒同臨眺忽思剡溪去水
石遠清妙雪盡天地明風開湖山貌悶為洛生詠醉發
吳越調赤霞動金光日足森海嶠獨散萬古意閒垂一
溪釣猿近天上啼人移月邊擢無以墨綬苦來求丹砂
要華髮長折腰將貽陶公誚

奇辭絡繹行以蒼峭之氣直達所懷絕無長語謝朓驚

人此故不減

楊慎曰梁虞騫詩落暉散長足細雨織斜文太白亦
用其字然其驚人泣鬼則劉勰所謂自鑄偉辭前無
古人者乎

昌祺曰悲壯處亦七哀之遺

御選唐宋詩醇卷五



總校官庶吉士臣張能照

校對官中書臣王 瓊

謄錄監生臣史映綵

欽定四庫全書薈要

集部

御選唐宋詩醇卷六

七

詳校官原任主事 李斯咏



欽定四庫全書薈要

御選唐宋詩醇卷六

隴西李白詩六

目錄

獻從叔當塗宰陽冰

贈汪倫

安陸白兆山桃花岳寄劉侍御綰

淮南卧病書懷寄蜀中趙徵君蕤

望終南山寄紫閣隱者

秋夜宿龍門香山寺奉寄王方城十七丈奉國營
上人從弟幼成令問

沙丘城下寄杜甫

淮陰書懷寄王宗城

聞王昌齡左遷龍標遙有此寄

憶舊遊寄譙郡元參軍

月夜江行寄崔員外宗之

宿白鷺洲寄楊江寧

新林浦阻風寄友人

寄韋南陵冰余江上乘興訪之遇尋顏尚書笑有此贈

題情深樹寄象公

壯山獨酌寄韋六

寄東魯二稚子

獨酌清溪江石上寄權昭夷

禪房懷友人岑倫

廬山謠寄盧侍御虛舟

春日歸山寄孟浩然

流夜郎至西塞驛寄裴隱

自漢陽病酒歸寄王明府

江夏寄漢陽輔錄事

早春寄王漢陽

江上寄元六林宗

涇溪南藍山下有落星潭可以卜築余泊舟石上
寄何判官昌浩

早過漆林渡寄萬巨

游敬亭寄崔侍御

自金陵泝流過白壁山翫月達天門寄句容王主
簿

秋日魯郡堯祠亭上宴別杜補闕范侍御

別魯頌

夢遊天姥吟留別

留別廣陵諸公

金陵酒肆留別

贈別鄭判官

黃鶴樓送孟浩然之廣陵

留別賈舍人至

渡荆門送別

南陵別兒童入京

江夏別宋之悌

南陽送客

送張舍人之江東

送王屋山人魏萬還王屋

送友人尋越中山水

魯郡堯祠送竇明府薄華還西京

金鄉送韋八之西京

魯郡東石門送杜二甫

灞陵行送別

送裴十八圖南歸嵩山

同王昌齡送族弟襄歸桂陽

送崔度還吳

金陵送張十一再遊東吳

御選唐宋詩醇卷六目錄

欽定四庫全書薈要卷一萬九千三百三十集部

御選唐宋詩醇卷六

隴西李白詩六

獻從叔當塗宰陽冰

金鏡靈六國亡新亂天經焉知高光起自有羽翼生蕭
曹安峴岬耿賈摧撓槍吾家有季父傑出聖代英雖無
三台位不借四豪名激昂風雲氣終協龍虎精弱冠燕
趙來賢彥多逢迎魯連善談笑季布折公卿遙知禮數

絕常恐不合并
惕想結宵夢
素心久已冥
顧慙青雲器

謬奉玉樽傾
山陽五百年
綠竹忽再榮
高歌振林木
大笑喧雷霆
落筆灑篆文
崩雲使人驚
吐辭又炳煥
五色羅華星
秀句滿江國
高才挾天庭
宰邑艱難時
浮雲空古城
居人若薙草
掃地無纖莖
惠澤及飛走
農夫盡歸耕
廣漢水萬里
長流玉琴聲
雅頌播吳越
還如泰階平
小子別金陵
來時白下亭
群鳳憐客鳥
差池相哀鳴
各拔五色毛
意重泰山輕
贈微所費廣
斗水澆長鯨
彈劍

歌苦寒嚴風起前楹月銜天門曉霜落牛渚清長歎即
歸路臨川空屏營

贈汪倫

李白乘舟將欲行忽聞岸上踏歌聲桃花潭水深千尺
不及汪倫送我情

楊齊賢曰白遊涇縣桃花潭村人汪倫常醞美酒以
待白倫之裔孫至今寶其詩

安陸白兆山桃花蟲寄劉侍御綰

雲卧三十年好閒復愛仙蓬壺雖冥絕鸞鶴心悠然歸
來桃花崑得憇雲窗眠對嶺人共語飲潭猿相連時昇
翠微上邈若羅浮巔兩岑抱東壑一嶂橫西天樹雜日
易隱崖傾月難圓芳草換野色飛蘿搖春煙入遠構石
室選幽閑上田獨此林下意杳無區中緣永辭霜臺客
千載方來旋

此等篇詠與鮑參軍謝宣城自是神合不徒形似

淮南卧病書懷寄蜀中趙徵君蕤

吳會一浮雲飄如遠行客功業莫從就歲光屢奔迫良
圖俄棄捐衰疾乃綿劇古琴藏虛匣長劍挂空壁楚冠
懷鍾儀越吟比莊舄國門遙天外鄉路遠山隔朝憶相
如臺夜夢子雲宅旅情初結緝秋氣方寂歷風入松下
清露出草間白故人不可見幽夢誰與適寄書西飛鴻
贈爾慰離析

亦是宣城一派視移病還園示親屬詩有過之無不及
也

楊慎曰太白渡荊門詩仍連故鄉水萬里送行舟送人之羅浮詩爾去之羅浮余還憇峨嵋及此詩國門遙天外四句皆寓鄉思

楊慎曰趙蕤梓州人精於數學蘇頌薦西蜀人才云趙蕤術數李白文章宋人注李詩遺其事

望終南山寄紫閣隱者

出門見南山引領意無限秀色難為名蒼翠日在眼有時白雲起天際自舒卷心中與之然託興每不淺何當

造幽人滅跡棲絕巘

淡雅自然處神似淵明白雲天際無心舒卷白詩妙有其意

秋夜宿龍門香山寺奉寄王方城十七丈奉國營上人從弟幼成令問

朝發汝海東暮棲龍門中水寒夕波急木落秋山空望極九霄迴賞幽萬壑通目皓沙上月心清松下風玉斗橫網戶銀河耿花宮興在趣方逸歡餘情未終鳳駕憶

王子虎溪懷遠公
挂枝坐蕭瑟
棣華不復同
流恨寄伊水
盈盈焉可窮

沙丘城下寄杜甫

我來竟何事
高卧沙丘城
城邊有古樹
日夕連秋聲
魯酒不可醉
齊歌空復情
思君若汶水
浩蕩寄南征

白與杜甫相知
最深飯顆山頭一絕
本事詩及酉陽雜俎
載之蓋流俗傳聞之
說白集無是也
鮑庚陰何詞流
所重李杜實嘗宗之
特所成就者大不寄
其籬下耳安

得以為譏議之辭乎甫詩及白者十餘見白詩亦屢及甫即此結語情亦不薄矣世俗輕誣古人往往類是尚論者當知之

鍾惺曰一片真氣

沈德潛曰有餘地有餘情此詩家正聲也浮淺者以
為無味

淮陰書懷寄王宗城

沙墩至梁苑二十五長亭大舶夾雙牖中流鷺鶴鳴雲

天掃空碧川嶽涵餘清飛鳧從西來適與佳興并眷言
王喬爲婉孌故人情復此親懿會而增交道榮沿洄且
不定飄忽悵徂征暝投淮陰宿欣得漂母迎斗酒烹黃
雞一餐感素誠予爲楚壯士不是魯諸生有德必報之
千金恥爲輕緬書羈孤意遠寄擢歌聲

一起真有萬夫之稟呂本中稱此篇與關山月爲氣雄
一世非虛言也

聞王昌齡左遷龍標遙有此寄

楊花落盡子規啼聞道龍標過五溪我寄愁心與明月
隨風直到夜郎西

胡應麟曰此詩及下江陵洛陽聞笛望天門山等作
真有揮斥八極凌厲九霄之意

沈德潛曰即將心寄明月流影入君懷之意出以搖
曳之筆語意一新

憶舊遊寄譙郡元參軍

憶昔洛陽董糟丘為余天津橋南造酒樓黃金白璧買

歌笑一醉累月輕王侯海內賢豪青雲客就中與君心
莫逆迴山轉海不作難傾情倒意無所惜我向淮南攀
桂枝君留洛北愁夢思不忍別還相隨相隨迢迢訪仙
城三十六曲水迴縈一溪初入千花明萬壑度盡松風
聲銀鞍金絡倒平地漢東太守來相迎紫陽之真人邀
我吹玉笙餐霞樓上動仙樂嘈然宛似鸞鳳鳴袖長管
催欲輕舉漢中太守醉起舞手持錦袍覆我身我醉橫
眠枕其股當筵意氣凌九霄星離雨散不終朝分飛楚

關山水遙余既還山尋故巢君亦歸家度渭橋君家嚴
君勇貔虎作尹并州遏戎虜五月相呼度太行摧輪不
道羊腸苦行來北涼歲月深感君貴義輕黃金瓊杯綺
食青玉案使我醉飽無歸心時時出向城西曲晉祠流
水如碧玉浮舟弄水簫鼓鳴微波龍鱗莎草綠興來携
妓恣經過其若楊花似雪何紅粧欲醉宜斜日百尺清
潭寫翠娥翠娥嬋娟初月輝美人更唱舞羅衣清風吹
歌入空去歌曲自繞行雲飛此時行樂難再遇西遊因

獻長楊賦壯闕青雲不可期東山白首還歸去渭橋南
頭一遇君鄼臺之壯又離羣問余別恨知多少落花春
暮爭紛紛言亦不可盡情亦不可極呼兒長跪緘此辭
寄君千里遙相憶

白詩天才縱逸至於七言長古往往風雨爭飛魚龍百
變又如大江無風波浪自湧白雲從空隨風變滅誠可
謂怪偉奇絕者矣此篇最有紀律可循歷數舊遊純用
序事之法以離合為經緯以轉折為節奏結構極嚴而

神氣自暢至於奇情勝致使覽者應接不暇又其才之獨擅者耳

唐汝詢曰此篇叙事四轉語若貫珠又非初唐牽合之比長篇當以此為法

吳昌祺曰長篇步步奇崛蒼勁亦天然筆力也

楊齊賢曰唐地理志亳州譙郡有鄆縣鄆才何切蕭何子孫所續封何所封音贊漢屬南陽郡

月夜江行寄崔員外宗之

飄飄江風起蕭颯海樹秋登艫美清夜挂席移輕舟月
隨碧山轉水合青天流杳如星河上但覺雲林幽歸路
方浩浩徂川去悠悠徒悲蕙草歇復聽菱歌愁岸曲迷
後浦沙明瞰前洲懷君不可見望遠增離憂

可謂工於發端警句亦直逼二謝

宿白鷺洲寄楊江寧

朝別朱雀門暮棲白鷺洲波光搖海月星影入城樓望
美金陵宰如思瓊樹憂徒令魂入夢翻覺夜成秋綠水

解人意為余西北流因聲玉琴裏蕩漾寄君愁
節諧語警

新林浦阻風寄友人

潮水定可信天風難與期清晨西北轉薄暮東南吹以
此難挂席佳期益相思海月破圓影孤蔕生綠池昨日
北湖梅開花已滿枝今朝東門柳夾道垂青絲歲物忽
如此我来定幾時紛紛江上雪草草客中悲明發新林
浦空吟謝朓詩

起勢奇崛寄懷處不勝晚晚之歎

寄韋南陵永余江上乘興訪之遇尋顏尚書笑有
此贈

南船正東風北船來自緩江上相逢借問君語笑未了
風吹斷聞君携妓訪情人應為尚書不顧身堂上三千
珠履客甕中百斛金陵春恨我阻此樂淹留楚江濱月
色醉遠客山花開欲然春風狂殺人一日劇三年乘興
嫌太遲焚却子猷船夢見五柳枝已堪挂馬鞭何日到

彭澤長歌陶令前

語笑未了風吹斷
畫出兩舟相遇情
景鍾惺極賞其工
題情深樹寄象公

腸斷枝上猿淚添
山下樽白雲見我
去亦為我飛翻
古意然必有所謂
不必強解或以白
雲為白虎引周處
射虎事實之更屬
紕繆

北山獨酌寄韋六

巢父將許由未聞
買山隱道存跡自
高何憚去人近紛

吾下茲嶺地閑喧亦泯門橫羣岫開水鑿衆泉引屏高
而在雲竇深莫能準川光書昏凝林氣夕淒緊於焉摘
朱果兼得養玄牝坐月觀寶書拂霜弄瑤軫傾壺事幽
酌顧影還獨盡念君風塵游傲爾令自哂

鮑謝集中高作

寄東魯二稚子

吳地桑葉綠吳蠶已三眠我家寄東魯誰種龜陰田春
事已不及江行復茫然南風吹歸心飛墮酒樓前樓東

一株桃枝葉拂青煙此樹我所種別來向三年桃今與
樓齊我行尚未旋嬌女字平陽折花倚桃邊折花不見
我淚下如流泉小兒名伯禽與姊亦齊肩雙行桃樹下
撫背復誰憐念此失次第肝腸日憂煎裂素寫遠意因
之汶陽川

范杼曰天下喪亂骨肉分離此老杜詠懷入門號咷
以下意也然彼合此離彼則哭其死此則憐其生彼
兼時事此乃單咏要皆憂思之正者也

沈德潛曰家常語瑣瑣屑屑彌見其真

廣記曰太白於任城縣造酒樓其居在酒樓前

獨酌清溪江石上寄權昭夷

我携一尊酒獨上江祖石自從天地開更長幾千尺舉
杯向天笑天迴日西照永願坐此石長垂嚴陵釣寄謝
山中人可與爾同調

禪房懷友人岑倫

自注時南遊羅浮兼泛桂海自
春徂秋不返僕旅江外書情寄

之

嬋娟羅浮月搖艷桂水雲美人竟獨往而我安得羣一
朝語笑隔萬里懽情分沈吟綵霞沒夢寐群芳歇歸鴻
渡三湘遊子在百粵邊塵染衣劒白日彫華髮春風變
楚關秋聲落吳山草木結悲緒風沙淒苦顏却來已永
久頽思如循環飄飄限江裔想像空留滯離憂每醉心
別淚徒盈袂坐愁青天末出望黃雲蔽目極何悠悠梅
花南嶺頭空長減征鳥水濶無還舟寶劍終難託金囊
非易求歸來儻有問桂樹山之幽

稱心而言意足而止情深語摯老筆紛披

廬山謠寄盧侍御虛舟

我本楚狂人鳳歌笑孔丘手持綠玉杖朝別黃鶴樓五
嶽尋仙不辭遠一生好入名山遊廬山秀出南斗傍屏
風九疊雲錦張影落明湖青黛光金闕前開二峰長銀
河倒挂三石梁香爐瀑布遙相望迴崖沓嶂凌蒼蒼翠
影紅霞映朝日鳥飛不到吳天長登高壯觀天地間大
江茫茫去不還黃雲萬里動風色白波九道流雪山好

為廬山謠興因廬山發閒窺石鏡清我心謝公行處蒼苔沒早服還丹無世情琴心三疊道初成遙見仙人綵雲裏手把芙蓉朝玉京先期汗漫九垓上願接盧敖遊太清

天馬行空不可羈紲

桂臨川曰全篇開闔軼蕩冠絕古今即使工部為之未易及此高岑輩恐亦脅息其襟期雄曠辭旨慷慨音節瀏亮無一不可

春日歸山寄孟浩然

朱紱遺塵境青山謁梵筵金繩開覺路寶筏度迷川
樹攢飛拱岵花覆谷泉塔形標海月樓勢出江煙香氣
三天下鐘聲萬壑連荷秋珠已滿松密蓋初圓鳥聚疑
聞法龍參若護禪媿非流水韻叨入伯牙弦

方回曰太白負不羈之才樂府大篇翕忽變化而律
詩乃工夫縝密如此杜審言宋之問相伯仲
道經三天者清微天禹餘天大赤天也

流夜郎至西塞驛寄裴隱

揚帆借天風水驛苦不緩平明及西塞已先投沙伴迴
巒引羣峰橫蹙楚山斷砮衝萬壑會震沓百川湍龍怪
潛溟波俟時救災旱我行望雷雨安得霑枯散鳥去天
路長人愁春光短空將澤畔吟寄爾江南管

自漢陽病酒歸寄王明府

去歲左遷夜郎道琉璃硯水長枯槁今年救放巫山陽
蛟龍筆翰生輝光聖主還聽子虛賦相如却與論文章

願掃鸚鵡洲與君醉百場嘯起白雲飛七澤歌吟潯水
動三湘莫惜連船沽美酒千金一擲買春芳
平生飛動意見爾不能無胸懷正復如此

江夏寄漢陽輔錄事

誰道此水廣狹如一匹練江夏黃鶴樓青山漢陽縣大
語猶可聞故人難可見君草陳琳檄我書魯連箭報國
有壯心龍顏不迴眷西飛精衛鳥東海何由填鼓角徒
悲鳴樓船習征戰抽劍步霜月夜行空庭徧長呼結浮

雲埋沒顧榮扇他日觀軍容投壺接高宴

早春寄王漢陽

聞道春還未相識走傍寒梅訪消息昨夜東風入武陽
陌頭楊柳黃金色碧水浩浩雲茫茫美人不來空斷腸
預拂青山一片石與君連日醉壺觴

秀骨天成偶然涉筆無不入妙

江上寄元六林宗

霜落江始寒楓葉綵未脫客行悲清秋永路苦不達滄

波眇川汜白日隱天末停棹依林巒驚猿相呌聒夜分
河漢轉起視溟漲闊涼風何蕭蕭流水鳴活活浦沙淨
如洗海月明可掇蘭交空懷思瓊樹詎解渴勗哉滄洲
心歲晚庶不奪幽賞頗自得興遠與誰豁

涇溪南藍山下有落星潭可以卜築余泊舟石上
寄何判官昌浩

藍岑竦天壁突兀如鯨額奔蹙橫澄潭勢吞落星石沙
帶秋月明水搖寒山碧佳境宜緩擢清輝能留客恨君

阻歡遊使我自驚惕所期俱卜築結茅鍊金液

早過漆林渡寄萬巨

西經大藍山南來漆林渡水色倒空青
林煙橫積素漏流昔吞翕沓浪競奔注
潭落天上星龍開水中霧嶢巖注公柵
突兀陳焦墓嶺峭紛上千川明屢迴顧
因思萬夫子解渴同瓊樹何日覩清光
相歡詠佳句

游敬亭寄崔侍御

我家敬亭下輒繼謝公作相去數百年
風期宛如昨登

高素秋月下望青山郭俯視鴛鴦群飲啄自鳴躍夫子
雖蹭蹬瑤臺雪中鶴獨立窺浮雲其心在寥廓時來顧
我笑一飯葵與藿世路如秋風相逢盡蕭索腰間玉具
劍意許無遺諾壯士不可輕相期在雲閣

自金陵泝流過白壁山翫月達天門寄句容王主
簿

滄江泝流歸白壁見秋月秋月照白壁皓如山陰雪幽
人停宵征賈客忘早發進帆天門山迴首牛渚沒川長

信風來日出宿霧歇故人在咫尺新賞成胡越寄君青
蘭花惠我庶不絕

白寄人之詩大致泛濫於元嘉以還此前諸篇皆是也
白嘗謂建安以來綺麗非珍蓋亦大概言之至其間表
表諸人曷嘗不歷聞入室相與周旋出入乎特才實邁
古故大而化之其淵源有自來矣杜甫亦復如是詞人
落筆往往過當甫嘗云陶謝不枝梧他日則云安得思
如陶謝手令渠述作與同遊後人過尊二家或欲盡薄

從前非通論也

秋日魯郡堯祠亭上宴別杜補闕范侍御

我覺秋興逸誰云秋興悲山將落日去水與晴空宜
魯酒白玉壺送行駐金羈歇鞍憇古木解帶挂橫枝
歌鼓川上亭曲度神飈吹雲歸碧海夕雁沒青天時
相失各萬里茫然空爾思

飄然而來戛然而止格調高逸有如鵬翔未息翩翩而
自逝

胡震亨曰太白詩押宜字韻者凡五見此其一也他如月色望不盡空天交相宜謔浪偏相宜置酒正相宜春風與醉客今日乃相宜韻致俱勝

段成式曰李集有堯祠贈杜補闕者老杜也

別魯頌

誰道泰山高下却魯連節誰云秦軍衆推却魯連舌獨立天地間清風灑蘭雪夫子還倜儻攻文繼前烈錯落石上松無為秋霜折贈言鏤寶刀千歲庶不滅

與堯祠宴別二詩皆極清健太冲挺拔景純豪雋非潘陸諸人之比

劉辰翁曰上六句意象高迥自切事情結末古意選語

夢遊天姥吟留別

海客談瀛洲煙濤微茫信難求越人語天姥雲霓明滅或可覩天姥連天向天橫勢拔五嶽掩赤城天台四萬八千丈對此欲倒東南傾我欲因之夢吳越一夜飛度

鏡湖月湖月照我影送我至剡溪謝公宿處今尚在淶
水蕩漾清猿啼脚著謝公屐身登青雲梯半壁見海日
空中聞天鷄千巖萬轉路不定迷花倚石忽已暝熊咆
龍吟殷巖泉慄深林兮驚層巔雲青青兮欲雨水澹澹
兮生煙列缺霹靂丘巒崩摧洞天石扇訇然中開青冥
浩蕩不見底日月照耀金銀臺霓為衣兮風為馬雲之
君兮紛紛而來下虎鼓瑟兮鸞迴車仙之人兮列如麻
忽魂悸以魄動恍驚起而長嗟惟覺時之枕席失向來

之煙霞世間行樂亦如此古來萬事東流水別君去時
何時還且放白鹿青崖間須行即騎訪名山安能摧眉
折腰事權貴使我不得開心顏

七言歌行本出楚騷樂府至於太白然後窮極筆力優
入聖域昔人謂其以氣為主以自然為宗以俊逸高暢
為貴咏之使人飄揚欲仙而尤推其天姥吟遠別離等
篇以為雖子美不能道蓋其才橫絕一世故興會標舉
非學可及正不必執此謂子美不能及也此篇天姥離

奇不可方物然因語而夢因夢而悟因悟而別節次相生絲毫不亂若中間夢境迷離不過詞意偉怪耳胡應麟以為無首無尾窈冥昏默是真不可以說夢也特謂非其才力學之立見顛踣則誠然耳

范杼曰夢吳越以下夢之源也次諸節夢之波瀾也其間顯而晦晦而顯非太白之胸次筆力亦不能發此

高棅曰白遠別離長相思烏栖曲鳴臯歌梁園吟天

姥吟廬山謠等作長篇短韻驅駕氣勢殆與南山秋色爭高可也

王世貞曰歐陽公自謂廬山高明妃曲李杜所不能作非公言也無論其他只半壁見海日空中聞天雞率爾語公能道否

留別廣陵諸公

憶昔作少年結交趙與燕金羈絡駿馬錦帶橫龍泉寸心無疑事所向非徒然晚節覺此疎獵精草太玄空名

束壯士薄俗棄高賢中田聖明顧揮翰凌雲煙騎虎不
敢下攀龍忽墮天還家守清真孤潔勵秋蟬鍊丹費火
石採藥窮山川卧海不關人租稅遼東田乘興忽復起
擢歌溪中船臨醉謝葛強山公欲倒鞭狂歌自此別垂
釣滄浪前

金陵酒肆留別

風吹柳花滿店香吳姬壓酒喚客嘗金陵子弟來相送
欲行不行各盡觴請君試問東流水別意與之誰短長

言有盡而意無窮味在酸醎之外

黃庭堅曰學者若不見古人用意處但得其皮毛所以去之甚遠如此詩若人復能為首句亦未是太白至於次句壓酒字他人亦自難及三四句益不同五六句乃真太白妙處當潛心焉

鍾惺曰不須多亦不須深寫得情出

贈別鄭判官

竄逐勿復哀慚君問寒灰浮雲本無意吹落章華臺遠

別淚空盡長愁心已推二年吟澤畔顛顚幾時迴

黃鶴樓送孟浩然之廣陵

故人西辭黃鶴樓煙花三月下揚州孤帆遠影碧空盡
唯見長江天際流

語近情遙有手揮五弦目送飛鴻之妙

唐汝詢曰目力已極離思無涯悵望之情俱在言外
留別賈舍人至

大梁白雲起飄飄來南洲裴回蒼梧野十見羅浮秋黿

抃山海傾四溟揚洪流意欲託孤鳳從之摩天遊鳳苦
道路難翱翔還崑丘不肯銜我去哀鳴慙不周遠客謝
主人明珠難暗投拂拭倚天劍西登岳陽樓長嘯萬里
風掃清胸中憂誰念劉越石化為繞指柔

秋風吹胡霜凋此簷下芳折芳怨歲晚離別悽以傷謬
攀青瑣賢延我於壯堂君為長沙客我獨之夜郎勸此
一杯酒豈惟道路長割珠兩分贈寸心貴不忘何必兒
女仁相看淚成行

深於比喻乃騷人之遺意其音哀婉情景正合

渡荆門送別

渡遠荆門外來從楚國遊
山隨平野盡江入大荒流
月下飛天鏡雲生結海樓
仍連故鄉水萬里送行舟

項聯與杜甫之星隨平野闊月湧大江流句法相類亦
氣勢均敵胡震亨以杜為勝亦故為低昂耳

南陵別兒童入京

白酒新熟山中歸黃雞啄黍秋正肥
呼童烹雞酌白酒

兒女嬉笑牽人衣高歌取醉欲自慰起舞落日爭光輝
游說萬乘苦不早著鞭跨馬涉遠道會稽愚婦輕買臣
余亦辭家西入秦仰天大笑出門去我輩豈是蓬蒿人
結句以直致見風格所謂辭意俱盡如截奔馬

江夏別宋之悌

楚水清若空遙將碧海通人分千里外興在一杯中
谷鳥吟晴日江猿嘯晚風平生不下淚於此泣無窮
登高而呼衆山皆響

胡震亨曰頂聯與達夫功名萬里外心事一杯中似
皆從庾抱之悲生萬里外恨起一杯中來而達夫較
厚太白較逸並未易軒輊

胡應麟云高雖渾厚易到李則超逸入神

南陽送客

斗酒勿為薄寸心貴不忘坐惜故人去偏令遊子傷離
顏怨芳草春思結垂楊揮手再三別臨歧空斷腸

從古詩十九首脫化而出詞意俱古咏至五六可謂蘊

藉風流矣

鍾惺曰項聯是客中送客語說得渾然不覺

送張舍人之江東

張翰江東去正值秋風時天清一鴈遠海濶孤帆遲白
日行欲暮滄波杳難期吳洲如見月千里幸相思

方回曰一雁孤帆之句亦以寓吾道不偶之歎下句
引白日滄波而云行欲暮杳難期意可見也

送王屋山人魏萬還王屋

并序

王屋山人魏萬云自嵩宋沿吳相訪數千里不遇乘
興遊台越經永嘉觀謝公石門後於廣陵相見美其
愛文好古浪跡方外因述其行而贈是詩

僊人東方生浩蕩弄雲海沛然垂天遊獨往失所在魏
侯繼大名本家聊攝城卷舒入元化跡與古賢并十三
弄文史揮筆如振綺辯折田巴生心齊魯連子西涉清
洛源頗驚人世喧采秀卧王屋因窺洞天門却來遊嵩
峯羽客何雙雙朝携月光子暮宿玉女牕鬼谷上窈窕

龍潭下奔深東浮汴河水訪我三千里逸興滿吳雲飄
颻淞江汎揮手抗越間樟亭望潮還濤卷海門石雲橫
天際山白馬走素車雷奔駭心顏遙聞會稽美且度耶
溪水萬壑與千巖崢嶸鏡湖裏秀色不可名清輝滿江
城人遊月邊去舟在空中行此中久延佇入剡尋王許
笑讀曹娥碑沈吟黃絹語天台連四明日入向國清五
峰轉月色百里行松聲靈溪恣沿越華頂殊超忽石梁
橫青天側足履半月忽然思永嘉不憚海路賒挂席歷

海嶠迴瞻赤城霞赤城漸微沒孤嶼前嶢兀水續萬古
流亭空千霜月縉雲川谷難石門最可觀瀑布挂北斗
莫窮此水端噴壁灑素雪空濛生晝寒却思惡溪去寧
懼惡溪惡咆哮七十灘水石相噴薄路創李北海

李公
邕昔

為括州開
此嶺路

巖開謝康樂

惡溪有謝康
樂題詩處

松風和猿聲搜索

連洞壑徑出梅花橋雙溪納歸潮落帆金華岬赤松若
可招沈約八詠樓城西孤宮堯宮堯四荒外曠望羣川
會雲卷天地開波連浙西大亂流新安口北指嚴光瀨

釣臺碧雲中邈與蒼嶺對稍稍來吳都裴回上姑蘇煙

綿橫九疑潏蕩見五湖目極心更遠悲歌但長吁迴橈

楚江濱揮策揚子津身著日本裘

裘則朝卿所贈日本布為之

昂藏

出風塵五月造我語知非佞人相逢樂無限水石日

在眼徒干五諸侯不致百金產吾友揚子雲弦歌播清

芬雖為江寧宰好與山公羣乘興但一行且知我愛君

君來幾何時僊臺應有期東窗綠玉樹定長三五枝至

今天壇人當笑爾歸遲我苦惜遠別茫然使心悲黃河

若不斷白首長相思

就彼所述鋪叙成文因其曲折緯以佳句大有帆隨湘轉水到渠成之致

胡震亨曰伯一作僂僂言癡也司馬相如賦伯以伯儼丑吏魚吏二切又音態礙注不前也雖似俗語其來已久

送友人尋越中山水

聞道稽山去偏宜謝客才千巖泉灑落萬壑樹縈迴東

海橫秦望西陵遠越臺湖清霜鏡曉
濤白雪山來八月枚乘筆三吳張翰
杯此中多逸興早晚向天台

挂臨川曰太白天才飄逸長律雖法
度整嚴而清骨不泯

魯郡堯祠送竇明府薄華還西京

自注時久病初起作

朝策犁眉騶舉鞭力不堪強扶愁疾
向何處角巾微服堯祠南長楊掃地
不見日石門噴作金沙潭笑誇故人
指絕境山光水色青於藍廟中往往
來擊鼓堯本無心

爾何苦門前長跪雙石人有女如花日歌舞銀鞍繡轂
往復迴簸林蹶石鳴風雷遠煙空翠時明滅白鷗歷亂
長飛雪紅泥亭子赤闌干碧流環轉青錦湍深沉百丈
洞海底那知不有蛟龍蟠君不見絳珠潭水流東海絳
珠紅粉沉光彩絳珠樓下花滿園今日曾無一枝在昨
夜秋聲閭闔來洞庭木落騷人哀遂將三五少年輩登
高遠望形神開生前一笑輕九鼎魏武何悲銅雀臺我
歌白雲倚牕牖爾聞其聲但揮手長風吹月度海來遙

勸仙人一杯酒酒中樂酣宵向分舉觴酌堯堯可聞何
不令臯繇擁篲橫八極直上青天揮浮雲高陽小飲真
瑣瑣山公酩酊何如我竹林七子去道賒蘭亭雄筆安
足誇堯祠笑殺五湖水至今顛悴空荷花爾向西秦我
東越暫向瀛洲訪金闕藍田太白若可期為予掃灑石
上月

起滅在手變化從心初曷嘗沾沾於矩矱而意之所到
無不應節合拍歌行至此豈非神品

金鄉送韋八之西京

客自長安來還歸長安去狂風吹我心西挂咸陽樹此
情不可道此別何時遇望望不見君連山起煙霧

魯郡東石門送杜二甫

醉別復幾日登臨徧池臺何時石門路重有金樽開秋
波落泗水海色明徂徠飛蓬各自遠且盡手中杯
無限低徊有說不盡處可謂情深於辭

灞陵行送別

送君灞陵亭灞水流浩浩上有無花之古樹下有傷心
之春草我向秦人問路岐云是王粲南登之古道古道
連綿走西京紫闕落日浮雲生正當今夕斷腸處黃鸝
愁絕不忍聽

古之傷心人別有懷抱是詩之謂矣

送裴十八圖南歸嵩山

君思潁水綠忽復歸嵩岑歸時莫洗耳為我洗其心洗
心得真情洗耳徒買名謝公終一起相與濟蒼生

沉刻之意以快語出之可令聞者驚竦

同王昌齡送族弟襄歸桂陽

秦地見碧草楚謠對清樽把酒爾何思鷓鴣啼南園余
欲羅浮隱猶懷明主恩躊躇紫宮戀孤負滄洲言終然
無心雲海上同飛翻相期乃不淺幽桂有芳根

蕭士贇曰細味此詩非一飯不忘君者乎議者何厚
誣太白之不如杜也

爾家何在瀟湘川青莎白石長沙邊昨夢江花照江日

幾枝正發東牕前覺來欲往心悠然魂隨越鳥飛南天
秦雲連山海相接桂水橫煙不可涉送君此去令人愁
風帆茫茫隔河洲春潭瓊草綠可折西寄長安明月樓
桂臨川曰情出至悃詞調警絕

送崔度還吳

自注度故人禮部
員外輔國之子

幽燕沙雪地萬里盡黃雲朝吹歸秋雁南飛日幾羣中
有孤鳳雛哀鳴九天聞我乃重此鳥綵章五色分胡為
雜凡禽雞鶩輕賤君舉手捧爾足疾心若火焚拂羽淚

滿面送之吳江濱去影忽不見躊躇日將曛
哀痛之音篤於故舊自見深情

金陵送張十一再遊東吳

張翰黃花句風流五百年誰人今繼作夫子世稱賢再
動游吳櫂還浮入海船春光白門柳霞色赤城天去國
難為別思歸各未旋空餘賈生淚相顧共悽然

張翰雜詩青條若總翠黃花如散金

御選唐宋詩醇卷六